

## Wes'i Lomba

Algun sientífiko a studia e influensia ku hóbenan tin riba komportashon di otro hóben. Nan a splika dies estudiante ku un pèrsona lo tene diferente karchi pa nan mira. Kada karchi lo tin tres liña di diferente largura. Un pèrsona lo muestra na kada liña riba e karchi. Ora e ta muestra na e liña mas largu, hisa man.

Ma UN di e dies hóbenan no tabata sa ku e otro nuebe a ser instruí adelantá pa hisa man pa e liña di DOS mas largu; NO vota pa e liña mas largu. Pa e promé karchi, nuebe man a bai laira pa liña A, ku klaramente tabata mas kòrtiku ku liña B. Esun ku no tabata sa di e triki a wak rònt ku inkredulidat. Tabata opvio ku liña B ta mas largu. Ma pasobra tur nuebe hóben a hisa man pa liña A, e tambe a hisa man pa nan no hari'é. I pa e siguiente karchinan, el a keda hisa man pa esun robes huntu ku e otro nuebe hóbenan, maske e tabata sa ku e ta skohe esun robes.

E sientífikonan a hasi e mésun tèst ku diferente hóben, i 75% di nan a hisa man huntu ku e otro nuebe estudiante. Nan no taba-tin e wes'i lomba pa kontradisí nan, maske nan tabata sa ku nan ta skohe robes. Solamente 25% tabatin kurashi pa vota diferente.

E estudio tambe a revelá, si ocho estudiante a vota pa e liña robes ma un hóben ta hisa man pa e liña korekto, e chèns tabata muchu mas grandi ku esun ku a ser opservá lo skohe pa e liña korekto. Un aliado a duna mas forsa pa hasi loke e sa ta korekto.

Nos tur ta deseá aseptashon di otronan. E deseo aki ta mas fuerte durante e añanan di tineidjer. Pa haña e aseptashon deseá, nan ke ta nèt manera tur otro hóben—hasi loke nan ta hasi, papia manera nan ta papia, bisti manera nan ta bisti, pensa manera nan ta pensa, èts. Nan tin miedu pa ta diferente.

No tin konsekuensia serio ora un hóben ta skohe e liña robes. Ademas, poko bes nos yunan tin ku skohe entre liñanan. En kontraste, nan ta skohe diariamente entre loke ta bon i malu, desishonnan ku **por tin konsekuensia bida largu!** Den demasiado kaso, nan ta opta pa loke ta malu simplemente pasobra **tur otro hóben ta hasié!** Nan no tin e wes'i lomba pa para nan so pa loke nan SA ta bon, bèrdat, korekto!

Tantu hóben ta falta e kurashi pa bisa “nò!” pa ku algu ku nan sa ta malu. Por ehèmpel, kua hóben no sa ku droga ta malu? Mayoría no ke mishu ku e porkeria ei. Ma tòg ora e hóben ta hañ'é ku amigunan ku ta usa droga i nan ta ofresé, pa motibu di miedu ku nan lo harié i hasi chèrchi di dje, e no ta dispuesto pa bisa “nò,” maske e sa ku droga ta malu.

Ma ta adolesentenan so ku ta falta wes'i lomba? Hopi adulto den nos komunidad tampoko tin e “guts” pa para nan so, inmovi-bel, pa loke nan sa ta bon, bèrdat, hustu, korekto... maske tur otro hende ta bai tras di loke ta robes, inhustu, eror, falsu, piká!

Bo lo no ta popular si bo ta riska ta diferente. Hesus tabatin wes'i lomba pa para so pa e bèrdat...i a ser krusifiká! Ma kua ta mas importante, popularidat òf un konsenshi limpi, sabiendo ku bo a para pa loke ta bon? Beibel ta reta nos pa para—**bo SO si ta nesario**—pa loke ta bon i bèrdat. “*..no sea conforme e mundu aki, ma sea transformá...*” (Romanonan 12:2). Hesus asta ta laga sa ku tin konsekuensia eterno pa esun ku no tin e wes'i lomba pa konfia Kristo so i para p'E i Bèrdat (Su Palabra). “*..ken ku tin bèrguensa di Mi i Mi palabranan den e generashon adúltero i pekaminoso aki, e Yu di Hende tambe lo tin bèrguensa di djé ora ku E bin den e gloria di Su Tata huntu ku e angelnan santu*” (Marko 8:38).

Siña bo yu loke ta bon i malu, i enkukurash'é pa para su so (si mester) pa loke ta bèrdat i bon. Ma no pensa ku e lo no hasié si abo no tin e “guts” pa hasi meskos! **E mester sa ku bo ta dispuesto pa para huntu ku n'é si e mester para su so pa e motibu korekto. Bo yu mester mira bo ehèmpel**

**Pa e por para su so, e mester sa ku ABO tin wes'i lomba!**